

**Uunga siunnersuut: Naalakkersuinikkut sulinermut aningaasatigut tapiissuteqartarneq pillugu inatsisartut inatsisaata allangortinneqarneranik Inatsisartut inatsisaat.**

(Suleriaatsimut Ataatsimiititaliaq)

**Saqqummiussissut**

(Inatsisartut Siulittaasuat)

**Siullermeerinnineq**

Inatsisartut Siulittaasoqarfiat sinnerlugu matumuuna Naalakkersuinikkut sulinermut aningaasatigut tapiissuteqartarneq pillugu inatsisartut inatsisaata allangortinneqarneranik Inatsisartut inatsisissaattut siunnersuut saqqummiunneqarpoq.

Inatsisissatut siunnersuut tapiissutit aqutigalugit naalakkersuinikkut suliniaqatigiiffinnik Namminersorlutik Oqartussat aningaasalersuinerannut malittarisassanik erseqqissaaneruvoq.

Tapiissuteqartarnermut inatsit atuuttoq 2001-imi akuersissutigineqarpoq, tamatumalu kingorna 2003-mi, 2005-imi, 2006-imi 2009-milu allangortinneqartarluni. 2009-mi ukiakkut ataatsimiinnermi inatsimmik annertunerusumik allangortitsinermi kingullermi partiinut tapiissutit qaffanneqarput, taamatullu aamma Namminersorlutik Oqartussanit sullissinertigut partiinut toqqaannangitsumik tapiissutit suuneri erseqqissumik takuneqarsinnaalersinneqarlutik, inatsimmi erseqqissarneqarmat toqqaannangitsumik tapiissutit suut Namminersorlutik Oqartussat tunniussinnaaneraat.

Inatsisip atuutilernerata kingorna allanik toqqaannartumik toqqaannangitsumillu tapiissuteqartoqarsinnaanngilaq, tamanna inatsisini erseqqissumik tunngavissaqartinnagu. Taamaaliornikkut aningaasaliissutit nunatta karsianit naalakkersuinikkut suliniaqatigiiffinnut taamatullu aamma Inatsisartut Allattoqarfiannut atugassangortinneqartut akornanni erseqqissumik paasiuminartumillu immikkoortitsisoqarnissaa siunertarineqarpoq.

Inatsimmik allangortitsinissamik siunnersuutikkut matumuuna siunertarineqarpoq Inatsisartut Allattoqarfiata naalakkersuinikkullu suliniaqatigiiffiit akornanni aningaasatigut attaveqarnerit naleqqussaqqinneqarnissaata tunngavissinneqarnissaa.

Aningaasaqarsiaqartitaaneq pillugu inatsisip 2003-mi akuersissutigineqarneratigut Kalaallit Nunaata ataatsimut qinersivinngortinneqarneranut atatillugu nunatsinnut tamarmut paasisassarsiorluni angalaninnaanermut naalakkersuinikkut suliniaqatigiiffiit periarfissinneqarput. Aningaasanilli paasisassarsiorluni angalanernut immikkoortinneqarsimasunik atuisinnaatitaaneq 2006-imi allangortinneqarpoq taamaalillunilu paasisassarsiorluni angalanissaq inatsisit innersuussutigalugit

piumasaqaatigineqarsinnaajunnaarluni, taamaattorli siulittaasoqarfiup tamakkuninnga akuersissuteqartarnissaa naatsorsuutigineqaannarluni.

Tamatuma malitsigaa 2009-mi ukiakkut ataatsimiinnermi naalackersuinikkut sulinermit aningaasatigut tapiissuteqartarneq pillugu inatsisip allanngortinneqarneratigut siunertarinqartut naalackersuinikkut suliniaqatigiiffiit Inatsisartullu allattoqarfiata aningaasaqarniarnerisa akornanni suli tamakkiisumik erseqqissumik immikkoortitsisoqannginnera.

Inatsisissatut siunnersuutikkut matumuuna naalackersuinikkut suliniaqatigiiffinnut tapiissutit 2011-mi januaarip aallaqqaataanit atuutilersumik qaffanneqassapput. Taamatut allanngortitsineq Inatsisartut Allattoqarfiata naalackersuinikkullu suliniaqatigiiffiit soqutigissagaat nalilerneqarneqarpoq.

Naalackersuinikkut suliniaqatigiiffiit namminneq naliliinertik tunngavigalugu aningaasaliissutit amerleriaataat paasisassarsiorluni angalanernut naalackersuinikkulluunniit suliaqarnermut allanut atorsinnaassavaat, taamalu aningaasatigut kiffaanngissuseqarnerulissallutik, tamatumunngalu peqatigitillugu Inatsisartut Allattoqarfiata siunissami paasisassarsiorluni angalanarluni qinnuteqaatinut atatillugu suliassanut allaffissornikkut piffissamik atuiunnaassalluni.

Inatsisissatut siunnersuummut nassuiaatit innersuussutigalugit matumuuna siunnersuut Inatsisartunut suliassanngortippara.